

Na inauguracion di Monumento 18 di Maart

Firmantenan na bida lo ta invitado special

ORANJESTAD - Un momento emocionante durante inauguracion di Monumento di 18 Maart lo ta e binimento hunto di e firmantenan, cu ainda ta na bida, di e peticion notarial cu na aña 1948 Cornelis Albert (Shon A) Eman a entregá na La Reina Wilhelmina pa Aruba haya un Status Aparte.

Tur e firmantenan na bida lo haña un invitacion special pa forma parti di e acto oficial di inauguracion di e busto di Shon A, cu cual nan a lucha schouder cu schouder y di e mosaiconan cu tin number di tur e firmantenan grabá pa eternidad.

Promé Minister Mr. Henny Eman y Vice Minister Presidente Glenbert Croes lo inaugurá e murayanan di e monumento cual ta bisa Monumento 18 di Maart.

Cuater firmante di e peticion notarial lo inaugurá e nombrenan y Sra. Viuda Blanche Eman hunto cu un nieto lo haci e acto di develo di e busto di Shon A Eman.

Minister di Husticia, Watty Vos kende tin añanan ta militá den e lucha aki lo ta e orador principal. E firmantenan di e peticion 1947-1948 por worde considerá como pioneronan di lucha pa Aruba bira "Baas den su mes Cas". Den tur skina di Aruba nan a reuní y duna muestra di nan determinacion pa bin un cambio den e constelacion estatal di Aruba.

Vision y curashi a caracterizá e Arubianonan aki. Aruba tabata un país seco y hopi isolá, sin embargo su lidernan y e pueblo no a aceptá ningun limitacion pa Aruba. Nan deseo pa progeso y autodeterminacion pa Aruba no por worde kibrá.

Na un edad hoben nan a yama Shon A Eman pa bin militá den e lucha aki, pa Aruba por bira "Baas den su mes Cas", e causa cu tabata worde liderá pa su tata Henny Eman. Den nan number el a bai entrega na su Mahestad La Reina Wilhelmina e peticion pa Aruba haya un Status Separá den Reino Hulandes.

Nan deseo tabata ancrá den 42 acto notarial. E documentacion oficial aki di deseo masal di pueblo Arubano pa bira un país riba su mes a haci

un impacto den Reino. Shon A tabata su so na Hulanda, pero den su braza e tabata carga e opinion di un pueblo determiná.

Shon A tabata riba un mision duro, pero cu un sostén moral di henter un pueblo. Cu e mandato y determinacion aki Shon A Eman tabata bai tambe Conferencia di Mesa Rondo y dia 18 di Maart 1948 el a logra e aceptacion unánime di un mocion den cual Aruba su derecho pa opta pa un Status Aparte pa promé bes a worde reconocí. Asina tambe e fundeshi di e lucha Arubano pa Status Aparte a worde poní.

E Monumento 18 di Maart pesey ta duna tributo na e fecha y hechonan histórico aki, na e jiu di terra stimá, Shon A Eman, kende te awe no a haña un busto na su memoria, y na e

determinacion di e pueblo Arubano. Grabá pa eternidad den e base di e Monumento 18 di Maart ta e nombrenan di tur e 2147 Arubano balente cu a lanta para y pone den man di Shon A Eman un mandato cla pa resoná na Hulanda: Aruba kier ta un país autonómo den Reino Hulandes.

Pa generacionnan cu lo sigui despues, Monumento 18 di Maart su dos murayanan sólido di concreto lo keda pa semper como símbolo di e determinacion cu cual e pueblo Arubano a para tras di su causa y banda di C.A. (Shon A) Eman, Abogado di Pueblo, un di su jiunan di terra cu di edad hoben a entregá su alma y curpa na e anhelo di mas grandi cu un pueblo por tin, esta e derecho pa e mes determiná su destino. □

